

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-1373/08
Sarajevo, 30.12.2008. godine

Z A P I S N I K
**19. SJEDNICE DOMA NARODA PARLAMENTA FEDERACIJE BOSNE I
HERCEGOVINE, održane 30. decembra 2008. godine**

Sjednica je počela u 10.35.

Sjednici je predsjedavao Stjepan Krešić, predsjedavajući Doma naroda Parlamenta Federacije.

Na početku sjednice predsjedavajući je pozdravio: delegate, a posebno potpredsjednicu Federacije BiH Spomenku Mičić, premijera Vlade Federacije BiH Nedžada Brankovića, zamjenika premijera i federalnog ministra finansija Vjekoslava Bevandu, ministre u Vladi Federacije BiH, predstavnike udruženja, sindikata, međunarodnih organizacija, goste i predstavnike akreditiranih medijskih kuća koji prate rad sjednice.

Izostanak sa sjednice opravdali su Jasenko Tufekčić, Muharem Serbezovski i Edina Papo.

Na osnovu evidencije Stručne službe, predsjedavajući je konstatovao da sjednici prisustvuje 40 delegata, što čini većinu, te da Dom naroda može raditi i punovažno odlučivati.

Prije prelaska na rad delegati su, jednoglasno (45 glasova), usvojili Zapisnik 17. sjednice Doma naroda Parlamenta Federacije Bosne i Hercegovine, održane 31.10; 20. i 27.11.2008. godine.

Na početku sjednice Svetozar Pudarić je izjavio da je izvršena povreda člana_108. Poslovnika o radu Doma naroda Parlamenta Federacije Bosne i Hercegovine, koji predviđa da prekid sjednice ne može trajati duže od 15 dana, a budući da 30.12. ističe petnaesti dan od prekida 18. sjednice, prema toj odredbi bi trebalo nastaviti 18. sjednicu, kako je navedeno u pozivu za sjednicu Doma naroda.

Nakon toga predsjedavajući je podsjetio delegate da, ako žele, na osnovu člana 104. Poslovnika o radu Doma naroda mogu postavljati delegatska pitanja, pokretati inicijative ili izraziti nezadovoljstvo dobijenim odgovorima.

Elvira Abdić-Jelenović je postavila dva pitanja.

Prvo pitanje je upućeno predsjedavajućem Doma naroda u vezi sa nenastavljanjem 18. sjednice Doma naroda.

Drugo pitanje je upućeno federalnom ministru finansija a odnosi se na to da li postoji urudžbeni broj u Federalnom ministarstvu finansija kojim je 15.12.2003. godine zaprimljen ovjereni i prevedeni revizorski nalaz Delojtet Tuš Prag na engleskom i bosanskom jeziku, a tiče se revizorske vlasničke strukture u „Agrokomercu“.

U vezi sa ovim pitanjem, predsjedavajući Stjepan Krešić je izjavio da je Kolegij Doma naroda odlučio da se prvo održi 19. sjednica a nastavak 18. sjednice nakon završetka 19. sjednice.

Bojan Bošnjak zatražio je od Vlade Federacije da mu se dostavi Informacija o poduzetim inspekcijskim mjerama u kompaniji „Arcelor Mittal Zenica“ kao i Izvještaj o realiziranju Zaključaka vezanih uz poduzete inspekcijske mjere u ovoj kompaniji.

Saša Magazinović postavio je dva pitanja Vladi Federacije.

Prvo pitanje se odnosi na analizu reklamne kampanje za Vladu Federacije koja je emitirana na Federalnoj televiziji, te je upitao kakvi su rezultati kampanje i da li Vlada Federacije ima namjeru pokretati ovakvu kampanju i u idućoj godini.

Drugo pitanje se odnosi na obraćanje Vlade Federacije građanima Federacije Bosne i Hercegovine s ciljem kupovine domaćih proizvoda kako bi se pomogla domaća privreda.

Nikola Simić je upitao ko je nadležan za Penziona-invalidsku komisiju koju je osnovao Kanton Središnja Bosna i Zeničko-dobojski kanton.

Besim Spahić je postavio dva pitanja.

Upitao je zašto se ne odgovara na postavljena delegatska pitanja, te ponovio pitanje koje se odnosilo na primanja rukovodećih ljudi u javnim preduzećima koja ostvaruju ekstra profit.

Drugo pitanje je postavljeno Federalnom ministarstvu pravde a odnosi se na proširenje zatvorskih kapaciteta za osuđenike.

Željko Asić je pokrenuo inicijativu za osnivanjem odjela za odnose sa javnošću Parlamenta Federacije BiH, čiji bi zadatak bio informiranje javnosti o radu oba doma Parlamenta Federacije BiH.

Ismet Imamović je postavio pitanje Direkciji cesta Federacije Bosne i Hercegovine da li su sredstva za izgradnju i rekonstrukciju magistralnog puta M-18 (2) predviđena u Budžetu za 2009. godinu.

Josip Perić uputio je pitanje predsjedniku Vlade Federacije i federalnom ministru pravde - prema kojem se zakonu vršila tzv. akcija inspekcijskog nadzora na području Federacije Bosne i Hercegovine s obzirom na presudu Ustavnog suda Federacije Bosne i Hercegovine kojom je jedan dio zakona proglašen neustavnim i da li je prema tom neustavnom zakonu vršen inspekcijski nadzor.

Andelko Mikulić pitao je zašto naši rudnici ne kupuju domaći eksploziv proizvođača „Vitezit“ iz Viteza, a drugo pitanje se odnosi na činjenicu da se električna energija po povoljnijoj cijeni prodaje stranim potrošačima nego domaćim. Izrazio je mišljenje kako bi trebalo pokrenuti inicijativu prema Vijeću ministara Bosne i Hercegovine kojom bi se zabranio izvoz svih sirovina dok se ne podmire potrebe domaćih proizvođača.

Mladen Lonić postavio je pitanje koje se odnosi na osiguranje sredstava u Budžetu Federacije za 2009. godinu za asfaltiranje magistralnog puta M-14 Bosanska Krupa – Bosanski Petrovac.

Drago Puzigaća je postavio dva pitanja.

Prvo pitanje je uputio Vladi Federacije a odnosi se na reviziju male privatizacije koja je vršena u Drvaru od 2002. godine do danas. Također je upitao da li Vlada Federacije planira da izvrši reviziju ove male privatizacije.

Drugo pitanje se odnosi na asfaltiranje puta Glamoč-Drvar.

Zoran Budimić postavio je pitanje federalnom ministru finansija da li su isplaćena sredstva za poticaje u poljoprivredi za ovu godinu i ako nisu kada će to biti urađeno.

Svetozar Pudarić je postavio pitanje u vezi sa primjenom Zakona o izmjenama i dopunama Zakona o javnim prihodima, s obzirom na Odluku Ustavnog suda Federacije Bosne i Hercegovine i zatražio da do naredne sjednice dobije izvode iz Trezora o ulasku i izlasku novčanih sredstava iz Uprave za nedirektno oporezivanje nakon 10.12.2008. godine.

Vjekoslav Bevanda je odgovorio da su 10.12.2008. godine stavljene izvan snage Izmjene Zakona o pripadnosti javnih prihoda. Federalno ministarstvo finansija je konsultovalo Ustavni sud Federacije Bosne i Hercegovine i dalo instrukciju, koja se odnosi na to da se ova sredstva od 10.12.2008. godine ne usmjeravaju za potrebe demobiliziranih branitelja. Također je istakao da se čeka i izjašnjenje Ustavnog suda Federacije Bosne i Hercegovine u vezi sa daljnjom procedurom.

Tomo Vidović je pitao Vladu Federacije što je poduzela u pogledu inicijative koju je podnijela Skupština Tuzlanskog kantona, kojom su se tražile izmjene i dopune Zakona o pripadnosti javnih prihoda u Federaciji Bosne i Hercegovine.

Mislav Sučić je postavio pitanje kada će predsjednik i potpredsjednici Federacije Bosne i Hercegovine i premijer i zamjenici premijera Federacije Bosne i Hercegovine podnijeti zahtjev za ocjenu ustavnosti određenog broja zakona koji su, prema njegovom mišljenju, neustavni.

Besim Imamović je postavio dva pitanja.

Prvo pitanje je postavio Vladi Federacije a odnosi se na rekonstrukciju i izgradnju puta Tuzla – Sarajevo.

Drugo pitanje je upućeno potpredsjedniku Federacije Mirsadu Kebi, a odnosi se na to da li je potpredsjednik Federacije imao ustavnih ovlaštenja da se sastane sa ministrom vanjskih poslova Republike Srbije Vukom Jeremićem.

Nakon postavljenih delegatskih pitanja i pokrenutih inicijativa, prešlo se na utvrđivanje dnevnog reda.

Predsjedavajući je obavijestio delegate da je Vlada Federacije dostavila sljedeće prijedloge zakona sa prijedlogom da se razmatraju po hitnom postupku:

1. Prijedlog Budžeta Federacije Bosne i Hercegovine za 2009. godinu,

2. Prijedlog Zakona o izvršavanju Budžeta Federacije Bosne i Hercegovine za 2009. godinu,
3. Prijedlog Zakona o izmjenama i dopunama Zakona o penzionom i invalidskom osiguranju i
4. Prijedlog Zakona o pomilovanju.

Također, predsjedavajući je obavijestio delegate da je Klub delegata bošnjačkog naroda u Domu naroda Federacije Bosne i Hercegovine podnio Prijedlog Zakona o izmjeni Zakona o budžetima u Federaciji Bosne i Hercegovine sa prijedlogom da se uvrsti u dnevni red i razmatra po hitnom postupku, što je podržao i premijer Nedžad Branković.

Potom je predsjedavajući, na osnovu rezultata glasanja, konstatovao da je Dom naroda Parlamenta Federacije Bosne i Hercegovine:

- sa 40 glasova za, uz dva glasa protiv i uz četiri uzdržana glasa, prihvatio da se Prijedlog Budžeta Federacije Bosne i Hercegovine za 2009. godinu razmatra po hitnom postupku;
- sa 39 glasova za, uz dva glasa protiv i uz pet uzdržanih glasova, prihvatio da se Prijedlog Zakona o izvršavanju Budžeta Federacije Bosne i Hercegovine za 2009. godinu razmatra po hitnom postupku;
- sa 41 glasom za i uz pet uzdržanih glasova, prihvatio da se Prijedlog Zakona o izmjenama i dopunama Zakona o penzionom i invalidskom osiguranju razmatra po hitnom postupku;
- sa 30 glasova za i 16 uzdržanih glasova prihvatio da se Prijedlog Zakona o pomilovanju razmatra po žurnom postupku;
- sa 37 glasova za, uz jedan glas protiv i uz osam uzdržanih glasova, prihvatio da se Prijedlog Zakona o izmjeni Zakona o budžetima u Federaciji Bosne i Hercegovine razmatra po hitnom postupku.

Kolegij Doma naroda je predložio da se u okviru 2. tačke dnevnog reda uvrsti tačka - Verifikovanje mandata novom delegatu. Također je predložio da se u dnevni red ove sjednice uvrsti kao 5. tačka dnevnog reda - Socijalni sporazum za period 2009.-2010. godine i Program mjera za ublažavanje posljedica globalne ekonomske krize i unapređenja poslovnog ambijenta.

Predsjednik Kluba delegata bošnjačkog naroda Alija Begović je predložio da Dom naroda donese Rezoluciju o osudi krvoprolića u Palestini, koju je pročitao.

U raspravi o ovom prijedlogu učestvovali su: predsjednik Kluba delegata hrvatskog naroda Josip Perić, Alija Begović, Svetozar Pudarić, Željko Asić i Igor Rajner. S obzirom na to da su u raspravi dati konkretni prijedlozi na tekst i naziv Rezolucije Alija Begović je, ispred predlagača, prihvatio da se te korekcije obave tokom sjednice.

Daliborka Milović je, ispred Komisije za izbor i imenovanja Doma naroda, predložila da se odloži razmatranje Odluke o imenovanju sudaca Ustavnog suda Federacije Bosne i Hercegovine za narednu sjednicu. Željko Asić je izjavio da Komisija za izbor i imenovanja Doma naroda nije donijela nikakvu odluku vezano uz imenovanje ovih sudaca.

Elvira Abdić-Jelenović je predložila da se Prijedlog Budžeta Federacije Bosne i Hercegovine za 2009. godine i Prijedlog Zakona o izvršavanju Budžeta Federacije Bosne i Hercegovine za 2009. godine razmatraju u formi nacrtu i zatražila da se o tome Dom izjasni.

Svetozar Pudarić je predložio da se u dnevni red ove sjednice neuvrštavaju tačke - Socijalni sporazum za period 2009.-2010. godina i Program mjera za ublažavanje posljedica globalne ekonomske krize i unapređenja poslovnog ambijenta - jer ih delegati nisu imali vremena proučiti.

Nakon ovih prijedloga predsjedavajući je dao pauzu kako bi se Kolegij konsultovao u vezi sa dnevnim redom.

Nakon pauze, predsjedavajući je pročitao dnevni red i pozvao delegate da se o njemu izjasne, te konstatovao da je Dom naroda, sa 37 glasova za, uz dva glasa protiv i uz četiri uzdržana glasa, usvojio sljedeći:

D N E V N I R E D

1. Amandman CIX. na Ustav Federacije Bosne i Hercegovine (predlagač: Ustavna komisija Predstavničkog doma);
2. Prestanak mandata delegatu i verifikovanje mandata delegatu;
3. Prijedlog Zakona o izmjeni Zakona o budžetima u Federaciji Bosne i Hercegovine (predlagač: Klub delegata bošnjačkog naroda u Domu naroda) – hitni postupak;
4. Prijedlog Budžeta Federacije Bosne i Hercegovine za 2009. godinu – hitni postupak;
5. Prijedlog Zakona o izvršavanju Budžeta Federacije Bosne i Hercegovine za 2009. godinu – hitni postupak;
6. Socijalni sporazum za period 2009.-2010. godina i Program mjera za ublažavanje posljedica globalne ekonomske krize i unapređenja poslovnog ambijenta;
7. Prijedlog Zakona o izmjenama i dopunama Zakona o penzionom i invalidskom osiguranju - hitni postupak;
8. Izjašnjavanje o Prijedlogu Zakona o finansijskoj konsolidaciji Javnog preduzeća "Željeznice Federacije BiH" d.o.o. Sarajevo za period od 01.01.2008. godine do 31.12.2012. godine;
9. Prijedlog Zakona o pomilovanju – hitni postupak;
10. Izjašnjavanje o Nacrtu Zakona o jedinstvenom sistemu registracije, kontrole i naplate doprinosa;
11. Izjašnjavanje o Prijedlogu Odluke o pristupanju izradi Prostornog plana područja posebnih obilježja od značaja za Federaciju Bosne i Hercegovine – Igman, Bjelašnica, Treskavica i kanjon rijeke Rakitnice (Visočica) za period od 2007. do 2027. godine;
12. Deklaracija o krvoproliću na Bliskom Istoku.

1. Amandman CIX. na Ustav Federacije Bosne i Hercegovine (predlagač: Ustavna komisija Predstavničkog doma)

Predstavnički dom je na nastavku 17. sjednice, održane 18.11.2008. godine, usvojio Amandman CIX. na Ustav Federacije Bosne i Hercegovine.

Ispred Komisije za ustavna pitanja Doma naroda predsjednik Komisije Omer Čevra predložio je da Dom naroda usvoji Amandman.

Predsjedavajući je podsjetio delegate da se na osnovu Amandmana L. na Ustav Federacije i člana 222. Poslovnika o radu Doma naroda predloženi Amandman na Ustav Federacije usvaja u Domu naroda prostom većinom, uključujući većinu bošnjačkih, većinu hrvatskih i većinu srpskih delegata.

Prvo su glasali bošnjački delegati.

Na osnovu rezultata glasanja, predsjedavajući je konstatovao da je za Amandman CIX. glasalo 13 bošnjačkih delegata.

Potom je pozvao hrvatske delegate da se izjasne o Amandmanu CIX.

Na osnovu rezultata glasanja, predsjedavajući je konstatovao da je za Amandman CIX. glasalo 12 hrvatskih delegata.

Nakon toga su glasali srpski delegati.

Na osnovu rezultata glasanja, predsjedavajući je konstatovao da je za Amandman CIX. glasalo 15 srpskih delegata.

Potom je predsjedavajući pozvao Dom naroda da se u cjelini izjasni o Amandmanu CIX.

Igor Rajner je citirao član 221. Poslovnika o radu Doma naroda, prema kojem se predloženi Amandman na Ustav Federacije neće konačno razmatrati u Domu naroda prije isteka roka od 15 dana nakon što je prvi put Amandman bio podnesen.

Potom se prešlo na glasanje o Odluci o proglašenju Amandmana CIX. na Ustav Federacije Bosne i Hercegovine.

Prijedlog Odluke je utvrdila Komisija za ustavna pitanja Doma naroda.

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 44 glasa za i uz jedan uzdržani glas, usvojio Odluku o proglašenju Amandmana CIX. na Ustav Federacije Bosne i Hercegovine.

2. Prestanak mandata delegatu i verifikovanje mandata delegatu

Predsjedavajući je obavijestio delegate da je delegatu Asimu Mekiću, zbog nespojivosti funkcije na koju je izabran prestao mandat u Domu naroda Parlamenta Federacije.

Središnja izborna komisija Bosne i Hercegovine dodjelila je mandat sljedećem kvalifikovanom kandidatu iz reda bošnjačkog naroda **Edinu Hozanu**.

Mandatno-imunitetska komisija razmatrala je izvještaj Središnje izborne komisije i dostavila Domu naroda svoj Izvještaj.

Ispred Mandatnog-imunitetske komisije govorila je Nada Čulap i predložila Domu naroda da verifikuje mandat Edinu Hozanu.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije jednoglasno (44 glasa) usvojio Izvještaj Mandatno-imunitetske komisije i time verifikovao mandat delegatu u Domu naroda Parlamenta Federacije Bosne i Hercegovine **Edinu Hozanu** iz reda bošnjačkog naroda.

Potom je Edin Hozan dao svečanu zakletvu.

Nakon toga predsjedavajući je predložio da se o tač. 3., 4. i 5. vodi zajednička rasprava što su delegati prihvatili.

- 3. Prijedlog Zakona o izmjeni Zakona o budžetima u Federaciji Bosne i Hercegovine**
- 4. Prijedlog Budžeta Federacije Bosne i Hercegovine za 2009. godinu**
- 5. Prijedlog Zakona o izvršavanju Budžeta Federacije Bosne i Hercegovine za 2009. godinu**

Prijedlog Zakona o izmjeni Zakona o budžetima u Federaciji Bosne i Hercegovine predložio je Klub delegata bošnjačkog naroda u Domu naroda.

Prijedlog Zakona je istovjetan tekstu Prijedloga Zakona koji je predložio Klub zastupnika SDA u Predstavničkom domu.

Predstavnički dom je na 17. vanrednoj sjednici od 29.12.2008. godine usvojio Prijedlog Zakona o izmjeni Zakona o budžetima u Federaciji Bosne i Hercegovine u tekstu kako ga je predložio predlagač - Klub zastupnika SDA u Predstavničkom domu.

Prijedlog Budžeta Federacije Bosne i Hercegovine za 2009. godinu utvrdila je Vlada Federacije.

Predstavnički dom je na 17. vanrednoj sjednici od 29.12.2008. godine usvojio Prijedlog Budžeta Federacije Bosne i Hercegovine za 2009. godinu sa amandmanom koji je Vlada Federacije prihvatila, a koji se odnosi na to da se sredstva sa pozicije Budžeta za hitne intervencije prebace na poziciju budžetskih rezervi Vlade Federacije. Tom prilikom je Predstavnički dom usvojio i Zaključke.

Prijedlog Zakona o izvršavanju Budžeta Federacije Bosne i Hercegovine za 2009. godinu utvrdila je Vlada Federacije.

Predstavnički dom je na 17. vanrednoj sjednici od 29.12.2008. godine usvojio Prijedlog Zakona o izvršavanju Budžeta Federacije Bosne i Hercegovine za 2009. godinu sa dva amandmana koje je Vlada Federacije prihvatila, pa su postali sastavni dio Prijedlog Zakona.

Prijedloge zakona razmatrala su nadležna radna tijela i dostavila svoje izvještaje.

Prijedlog Budžeta i prijedloge zakona obrazložili su premijer Federacije Nedžad Branković i federalni ministar finansija Vjekoslav Bevanda.

Na Prijedlog Budžeta tri amandamana podnijela je Lidija Bradara a Kenan Keserović šest amandmana.

Na Prijedlog Zakona o izmjeni Zakona o budžetima u Federaciji Bosne i Hercegovine amandman je podnio Igor Rajner.

U zajedničkoj raspravi učestvovali su: Svetozar Pudarić, premijer Nedžad Branković, Anto Bilić, Igor Rajner, Besim Imamović, Mira Ljubjankić, Nada Čulap, Zoran Budimić, Slobodan Rodić, Lidija Bradara, Denis Zvizdić, Tomo Vidović, Ivo Komšić, Drago Puzigaća, Muhamed Osmić, Josip Perić i federalni ministar finansija Vjekoslav Bevanda.

Nakon rasprave, budući da Vlada Federacije nije prihvatila podnesene amandmane, predsjedavajući je pozvao podnosiocce amandmana da se izjasne da li odustaju od svojih amandmana.

Budući da su svi podnosioci amandmana osim Kenana Keserevića odustali od svojih amandmana, predsjedavajući je dao na glasanje amandmane Kenana Keserovića i konstatovao sljedeće:

- Amandman I. nije dobio potrebnu većinu jer je za glasalo devet delegata;
- Amandman II. nije dobio potrebnu većinu jer je za glasalo sedam delegata;
- Amandman III. nije dobio potrebnu većinu jer je za glasalo devet delegata;
- Amandman IV. nije dobio potrebnu većinu jer je za glasalo osam delegata;
- Amandman V. nije dobio potrebnu većinu jer je za glasalo sedam delegata i
- Amandman VI. nije dobio potrebnu većinu jer je za glasalo sedam delegata.

Potom se prešlo na glasanje o tač. 3., 4. i 5.

3. Prijedlog Zakona o izmjeni Zakona o budžetima u Federaciji Bosne i Hercegovine

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 42 glasa za, uz dva glasa protiv i uz dva uzdržana glasa, usvojio Prijedlog Zakona o izmjeni Zakona o budžetima u Federaciji Bosne i Hercegovine.

4. Prijedlog Budžeta Federacije Bosne i Hercegovine za 2009. godinu

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 35 glasa za,

uz pet glasova protiv i uz šest uzdržanih glasova, usvojio Prijedlog Budžeta Federacije Bosne i Hercegovine za 2009. godinu.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 38 glasova za, uz dva glasa protiv i uz šest uzdržanih glasova, usvojio i sljedeće:

ZAKLJUČKE

1. Zadužuje se Vlada Federacije Bosne i Hercegovine da u roku od 60 dana pripremi i uputi u parlamentarnu proceduru zakone koji podrazumijevaju reformu i umanjenje budžetskih opterećenja Federacije Bosne i Hercegovine, posebno u socijalnom sektoru.
2. Zadužuje se Vlada Federacije Bosne i Hercegovine da u roku od 60 dana pripremi Prijedlog Zakona o plaćama i naknadama svih budžetskih korisnika u Federaciji Bosne i Hercegovine, podrazumijevajući sve nivoe vlasti u Federaciji Bosne i Hercegovine i privredna društva u većinskom državnom kapitalu.
3. Zadužuje se Vlada Federacije Bosne i Hercegovine da u aprilu 2009. godine pripremi rebalans budžeta na bazi analize toka prihoda i rashoda iz prvog kvartala 2009. godine.
4. Zadužuje se Vlada Federacije Bosne i Hercegovine da rezerve budžeta koristi prema sljedećim mjerilima:
 - a) 1/3 sredstava za održivost samoneodrživih nižih nivoa vlasti i sufinansiranje projekata nižih nivoa vlasti u Bosni i Hercegovini;
 - b) 1/3 sredstava za neophodna ravnanja neplaniranih potreba budžetskih korisnika, npr. Federalno ministarstvo prostornog uređenja, Federalno ministarstvo obrazovanja i nauke, Federalno ministarstvo za pitanja branitelja i invalida odbrambeno-oslobodilačkog rata, Federalno ministarstvo zdravstva, Federalno ministarstvo kulture i sporta;
 - c) 1/3 za interventne potrebe Federacije Bosne i Hercegovine.

5. Prijedlog Zakona o izvršavanju Budžeta Federacije Bosne i Hercegovine za 2009. godinu

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 34 glasa za, uz 10 glasova protiv i uz dva uzdržana glasa, usvojio Prijedlog Zakona o izvršavanju Budžeta Federacije Bosne i Hercegovine za 2009. godinu.

Nakon toga premijer Nedžad Branković zahvalio je delegatima na usvojenom budžetu i ispred Vlade Federacije preuzeo odgovornost da usvojene Zaključke izvrši u predviđenim rokovima.

6. Socijalni sporazum za period 2009.-2010. godina i Program mjera za ublažavanje posljedica globalne ekonomske krize i unapređenja poslovnog ambijenta

Ove materijale dostavila je Vlada Federacije.

Materijale je obrazložio premijer Nedžad Branković.

U raspravi su učestvovali: Elvira Abdić-Jelenović, Mislav Sučić, Mira Ljubijankić, Svetozar Pudarić, Igor Rajner, Ivo Komšić, Muhamed Osmić i Radoje Vidović.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 39 glasova za, uz jedan glas protiv i uz četiri uzdržana glasa, **primio k znanju** Socijalni sporazum za period 2009.-2010. godina i Program mjera za ublažavanje posljedica globalne ekonomske krize i unapređenja poslovnog ambijenta.

7. Prijedlog Zakona o izmjenama i dopunama Zakona o penzionom i invalidskom osiguranju

Prijedlog Zakona utvrdila je Vlada Federacije.

Predstavnički dom je na 17. vanrednoj sjednici od 29.12.2008. godine usvojio Prijedlog Zakona o izmjenama i dopunama Zakona o penzionom i invalidskom osiguranju sa dva amandmana koja je Vlada Federacije prihvatila pa su postali sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaj.

Prijedlog Zakona obrazložio je premijer Nedžad Branković.

U raspravi je učestvovao Igor Rajner.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 39 glasova za, uz jedan glas protiv i uz tri uzdržana glasa, usvojio Prijedlog Zakona o izmjenama i dopunama Zakona o penzionom i invalidskom osiguranju.

8. Izjašnjavanje o Prijedlogu Zakona o finansijskoj konsolidaciji Javnog preduzeća "Željeznice Federacije BiH" d.o.o. Sarajevo za period od 01.01.2008. do 31.12.2012. godine

Predsjedavajući je podsjetio delegate da je rasprava o Prijedlogu Zakona obavljena na 16. sjednici, održanoj 09.10.2008. godine, pa je potrebno izjasniti se o Prijedlogu Zakona.

Predstavnički dom je na 7. sjednici od 20.11.2007. godine usvojio Prijedlog Zakona u tekstu kako ga je predložila Vlada Federacije.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 35 glasova za,

uz tri glasa protiv i uz pet uzdržanih glasova, usvojio Prijedlog Zakona o finansijskoj konsolidaciji Javnog preduzeća "Željeznice Federacije BiH" d.o.o. Sarajevo za period od 01.01.2008. do 31.12.2012. godine.

9. Prijedlog Zakona o pomilovanju

Prijedlog Zakona utvrdila je Vlada Federacije.

Predstavnički dom je na 18. sjednici od 17.12.2008. godine usvojio Prijedlog Zakona sa varijantom broj jedan u članu 2. i sa tri amandmana koje je Vlada Federacije prihvatila pa su postali sastavni dio Prijedloga Zakona i sa dva amandmana koje Vlada Federacije nije prihvatila, ali ih je Predstavnički dom izglasao.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je federalni ministar pravde Feliks Vidović.

Na Prijedlog Zakona pet amandmana zajednički su podnijeli Kenan Keserović i Elvira Abdić-Jelenović.

U raspravi su učestvovali: Kenan Keserović i predsjednik Kluba delegata hrvatskog naroda Josip Perić koji je izjavio da će Klub podržati Prijedlog Zakona bez amandmana usvojenih na sjednici Predstavničkog doma.

Potom se prešlo na glasanje o amandmanima koje Vlada Federacije nije prihvatila, ali ih je Predstavnički dom izglasao.

Na osnovu rezultata glasanja, predsjedavajući je konstatovao da Dom naroda Parlamenta Federacije Bosne i Hercegovine nije usvojio Amandman I. koji se odnosi na član 3. jer je za njega glasalo 16 delegata.

Također, Dom naroda Parlamenta Federacije Bosne i Hercegovine nije usvojio Amandman II. koji se odnosi na dodavanje novog člana 3.a jer je za njega glasalo 11 delegata.

Budući da Vlada Federacije nije prihvatila amandmane Kenana Keserovića i Elvire Abdić-Jelenović, a pošto podnosioci nisu od njih odustali, predsjedavajući ih je dao na glasanje i konstatovao sljedeće:

- Amandman I. nije dobio potrebnu većinu jer je za glasalo devet delegata;
- Amandman II. nije dobio potrebnu većinu jer je za glasalo osam delegata;
- Amandman III. nije dobio potrebnu većinu jer je za glasalo pet delegata;
- Amandman IV. nije dobio potrebnu većinu jer je za glasalo deset delegata i
- Amandman V. nije dobio potrebnu većinu jer je za glasalo sedam delegata.

Potom se prešlo na glasanje o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 39 glasova za, uz jedan glas protiv i uz šest uzdržanih glasova, usvojio Prijedlog Zakona o pomilovanju.

Kako je Prijedlog Zakona usvojen u različitom tekstu u oba doma Parlamenta Federacije **potrebno ga je usaglasiti**.

10. Izjašnjavanje o Nacrtu Zakona o jedinstvenom sistemu registracije, kontrole i naplate doprinosa

Predsjedavajući je podsjetio delegate da je rasprava o Nacrtu Zakona obavljena na 17. sjednici od 31.10.2008. godine pa je potrebno da se obavi izjašnjenje o Nacrtu Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 42 glasa za, uz jedan glas protiv i uz tri uzdržana glasa, usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o jedinstvenom sistemu registracije, kontrole i naplate doprinosa i smatra da može poslužiti kao osnova za izradu prijedloga Zakona.
2. Zadužuje se Vlada Federacije Bosne i Hercegovine da prilikom izrade prijedloga Zakona ima u vidu prijedloge, primjedbe i sugestije iznesene na 17. sjednici Doma naroda.

11. Izjašnjavanje o Prijedlogu Odluke o pristupanju izradi Prostornog plana područja posebnih obilježja od značaja za Federaciju Bosne i Hercegovine – Igman, Bjelašnica, Treskavica i kanjon rijeke Rakitnice (Visočica) za period od 2007. do 2027. godine

Odluku je utvrdila Vlada Federacije i dostavila je Parlamentu Federacije Bosne i Hercegovine radi razmatranja i donošenja.

Predstavnički dom je na nastavku 17. sjednice od 18.11.2008. godine donio Odluku, uz amandman Vlade Federacije i dva amandmana koje je Vlada Federacije prihvatila pa su postali sastavni dio Prijedloga Odluke.

Na Prijedlog Odluke tri amandmana podnio je Mirsad Pindžo.

Budući da su amandmani I. i II. Mirsada Pindže, koji se odnose na tačku 5. stav 3. i na tačku 6. stav 2. istovjetni amandmanima koje je Vlada Federacije prihvatila na sjednici Predstavničkog doma, predsjedavajući je pozvao Mirsada Pindžu da se izjasni da li ostaje pri Amandmanu III. koji Vlada Federacije nije prihvatila.

Budući da je Mirsad Pindžo odustao od Amandamana predsjedavajući je dao Odluku na glasanje.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 44 glasa za, uz jedan uzdržani glas, donio Odluku o pristupanju izradi Prostornog plana područja posebnih obilježja od značaja za Federaciju Bosne i Hercegovine – Igman, Bjelašnica, Treskavica i kanjon rijeke Rakitnice (Visočica) za period od 2007. do 2027. godine.

12. Deklaracija o krvoproliću na Bliskom Istoku

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (45 glasova) donio Deklaraciju o osudi krvoprolića na Bliskom Istoku.

Tekst Deklaracije glasi:

Polazeći od principa poštivanja osnovnih ljudskih prava od kojih je prvo i osnovno pravo svakog ljudskog bića na slobodan i siguran život dostojan čovjeka, a zbog posljednje eskalacije nasilja u Palestini, Dom naroda Parlamenta Federacije Bosne i Hercegovine je na sjednici, održanoj 30.12.2008. godine donio

DEKLARACIJU O OSUDI KRVOPROLIĆA NA BLISKOM ISTOKU

Dom naroda Parlamenta Federacije Bosne i Hercegovine osuđuje posljednju eskalaciju nasilja na teritoriji Bliskog Istoka gdje je za samo dva dana ubijeno nekoliko stotina i ranjeno blizu hiljadu ljudi.

Sa posebnim ogorčenjem iskazujemo svoje protivljenje i protest zbog ubijanja nedužnih civila među kojima je veliki broj žena i djece. Ne postoji niti jedan legitiman cilj kojim bi se mogle opravdati nasilne akcije u kojima se nedužne ljudske žrtve tretiraju kao "kolateralna šteta". Stoga se pridružujemo svima onima koji sa najiskrenijim namjerama pokušavaju zaustaviti ovu nesreću.

Dom naroda Parlamenta Federacije Bosne i Hercegovine upućuje apel Parlamentarnoj skupštini Bosne i Hercegovine i Vijeću ministara Bosne i Hercegovine da putem Ujedinjenih naroda, Evropske unije i Konferencije islamskih zemalja zahtijeva poduzimanje hitnih mjera u cilju okončanja najnovijeg talasa krvoprolića.

Sjednica je završena u 16.54.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVALAČI

Stjepan Krešić